

In mais da pais

Las lingias grassas e finas da matg 2021

DAVID TRUTTMANN/FMR

Er quest mais ha dominà ina tematica ils discurs en Rumantschia. Na, i n'è betg corona! Mabain l'aura: la primavaira fraida cun bler vent. In veritabel matg da «l'aura sut».

Brinzauls è atgnamain sin spunda sulegliva, ma per il mument èsi pauc da rir. Il vitg ruschna e ruschna. Perquai ha la vischnanca Albula/Alvra perfin deliberà quest mais in credit d'inmez milliun per examinar co ch'i fiss da translocar l'entir vitg. Ditg simpel: Ils radund 100 abitants ed abitantas avessan da pachetar lur dachasa ed ir en in auter lieu. E quasi il medem mument ha il chantun Grischun communitgà quest mais che la bova da Brinzauls sa muventia cun ina sveltezza da record: var 1,6 meters per onn. Vulain resumar in pau salop: Enfin ch'il project per translocar il vitg pudess vegnir realisà, è quel plan gia maculatura – perquai che chasas e glied da Brinzauls han lura gia fatg viadi per radund 100 meters.

Per uschedir sin il sitg è l'equipa da ballape da las damas da la US Schluein Glion (USSI). L'equipa tschertga ina trenadra ni in trenader – era via inserats en gassetta. Envers la FMR ha la capitania da l'equipa ditg ch'ellas prendian encunter quasi tuttas annunzias pussaivlas: «Igl impurtont ei igl interess pil ballapei.» – Atgnamain dessi il mument quatter candidats fitg valabels, quatter trenaders svizzers cun gronda experientscha en Svizra e per part en l'exteriur, cun in grond palmares e tuts quatter gist senza club: *Christian Gross, Lucien Favre, Marcel Koller e Ciriaco Sforza*. In interess per ballape avessan quels segir. La dumonda è mo, sch'els fissan propi buns avunda per l'equipa da damas da la USSI?

Sch'i plova e sch'igl è fraid, lura èsi dad avair in tetg sur il chau. Però en Engiadina mancan las abitaziuns per indigens. Il manco è uschè acut che singuls



FOTO MADLAINA CAPEDE

indigens abiteschan en campers. La FMR ha purtretà quest mais in da quels: In giuven da Scuol e sia amia che vivan en in busin. Ussa, forse è tut quest svilup er in effect da l'interpresa «Mia Engiadina», la quala propagescha gist en temps da corona la lavur a distanza davent da l'Engiadina? Vul dir: Glied da la Bassa lavura regularmain en Engiadina en bellas abitaziuns. Tras quai crescha il squitsch immobigliar ed als indigens mancan las abitaziuns. Perquai fissi ussa prudent da proponer il cuntrari: Crear in interpresa cun il num «Mis Züri», la quala procura che Engiadinais ed Engiadinais possian finalmain lavurar sin distanza davent da Turitg.

Quest mais èsi vegnì cler sco il sulegl: testar fa effect! Il Grischun ha laschè analisar l'effect da sias activitads da testar en scolas ed en manaschis. La Confederaziun n'ha mai propi vulì siglir si sin il char grischun, nagin interess da Berna per tals tests a l'engronda. Ma quest mais ha apunta in institut confermà nair sin alv ch'ils tests gidian propi da tegnair en frain il virus. L'institut ch'ha furnì la conferma scientifica è la EMPA – in institut che vegn pajà per gronda part cun raps da la Confederaziun. Damai, il stadi na vul betg testar, schebain ch'il «agen» institut cumprova ch'i fiss prudent da far quai. Quai è bain detg interessant.

En las vischnancas da Sagogn, Schluein, Laax e Falera splendura il sulegl – ellas èn numnadamain sin buna via da s'avischinar. En radunanzas commemorablas han trais dad ellas gia ditg GEA quest mais, silmain per prender en mira emprims pass da fusiun. En il decurs dal zercladur decida anc Falera. Insumma, commemorablas èn stadas main las decisiuns sco tallas, mabain plitost las circumstanzas: Laax ha mess si spezialmain per quella radunanza ina gronda tenda. E Sagogn ha participà cun sia radunanza al project da pilot Covent, cun tests da corona avant la radunanza. Ins pudess dir: las vischnancas sa preparan atgnamain gia per il event grond – la gronda nozza: cun tests da corona ed ina flotta tenda da festa.

Causa las temperaturas fraidas avessan blers giavischè da pudair ir quest mais vers sid, vers il Tessin u l'Italia. E tgenina è la ruta grischuna la pli frequentada vers sid? – Sa chapescha l'autostrada A13 che passa tras la Val Schons e tras il tunnel dal San Bernardino. Però la redactura sutsilvana da la FMR ha rimnà las cifras dal traffic dals davos dus onns. E quellas fan surstar! A Pasca 2019 èn passads tras il tunnel 13 284 autos e cars. L'onn passà, a Pasca 2020 (amez l'emprim lockdown), èn passads mo minimis 351 vehichels. En Val Schons planiseschan gea ils famus architects Herzog & de Meuron

ina baselgia d'autostrada sco «lieu da pausada, da ruaus, d'uraziun e da spiritualità». Insumma, il ruaus e la pausa èn vegnids pli spert en la val che planisà.

Per fortuna èsi stà pli u main l'aura sitga quest onn sur Tschuncaisma a Schluein. Uschia ha pudì avair lieu en il liber la craisma da Sagogn e Schluein. Suttschiel avert ha il plevon e canoni *Alfred Cavelti* numnadamain pudì craismar dumengia e glindesdi da Tschuncaisma 22 giuvenils. Il particular: Il cult divin sacramental ha gè lieu en il stadion da ballape da la US Schluein Glion a Crap Gries. Quintessenza: Messas en stadions da ballape celebrescha atgnamain mo il papa – ed apunta era sur Alfred Cavelti.

Etge è capità anc uschiglio quest mais? Apunta, igl è stà fraid. Ma ussa pon avrir las portas da las ustarias stgaudadas. Uschia ch'i vegn segir bainprest pli chaud sin terrassa.

Dal rest hai dà il matg 2021 anc divers auters disturbis climatics, cun chametgs, duschas fraidas ed auters disturbis atmosferics: las cuntraversas en connex cun las iniziativas agraras, la lescha da CO₂ e l'iniziativa da chatscha. I va damai anc in mument, enfin ils 13 da zercladur, enfin ch'il clima sa normalisescha puspè – forsa.

Il mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en il Grischun ed insumma? Quai sa dumonda la redacziun da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala ed commentain quai cun in surrir. Mais per mais illustrescha normalmain il Bregagliot rumantsch *Jon Bischoff* il «mais da pais» cun in schurnal grafic. Quest mais ha el gè memia fraid la detta per dissegnar, perquai fa el pausa. Il proxim mais fa el puspè piz ses rispli.